

Молитва святителю Льву,

епископу Катанскому

Святче Божий, блаженне и преподобне отче наш и святителю Льве, Катанская похвало и всего мира христианскаго украшение! Приими молебное благодарственное пение нас, чтущих святую память твою, ибо и ты молиши за нас Христа Бога нашего. Умоли Его и ныне даровати нам крепкую, якоже и у тебе самаго, веру, утвердити в нас непоколебимую надежду, наипаче же причастити ны истинныя и нелицемерныя любви, яже есть союз совершенства, в сей бо любви Христовой, ты, отче и наставниче наш, пример достойнейший показал еси всем в богоугоднем житии твоём. Был бо еси усерднейший сирот кормитель, и нищих защититель, вдовиц и странных утешитель, и болящих молитвами твоими скорый исцелитель, чадом твоим духовным образ сый пастырского попечения и отец милостивый. Лукавым же бесом и прельщенным их служителем был еси воистину страшен и грозен, яко волком царственный лев, ибо силою молитв твоих вся козни их посрамлял еси, в борьбе с ними всячески их побеждая и величие

Божие прославляя. Тако злобнаго и ничимже исправленнаго Катанскаго волхва Илиодора, многих во искушение вводившаго силою бесовскою и посмеяние над ними творившаго на стогнах града и в самом храме Божиим, и тебе самага искусити похвалявшагося, связал еси честным твоим святительским омофором, и на огни посреде града сожегл еси, сам во огни стоя и невредим пребывая. Усердно убо тебе, отче Льве, недугующих целителя и козней бесовских на людей движимых победителя, просим и молим: защити нас, немощных и ослабевающих, от сих козней на ны движимых, от лукаваго духа злобы и нечистоты, такожде и от волхвования и чародейства злых и безумных человек, бесом волею служащих и его вражию силу в помощь себе призывающих. Умоли Господа, блаженнейший отче, да приидут в разум и благоговение и к церковному благочестию да преклонятся сии безумцы: аще ли же непреклонны во зле своем пребывают, — якоже онаго волхва Илиодора великою от Бога тебе дарованною силою покарай. И тако милость твою к нам являя, началовождь буди нашего спасения, да тобою побуждаеми, единым сердцем и едиными усты

прославим единого и благаго Бога, Отца и Сына, и Святаго Духа во веки веков. **Аминь.**

## **Молитва Божией Матери**

### **от лица изографов**

**Пресвятая Владычице, Дево Богородице, Мати Христа Бога нашего! Вонми гласу моления нашего, от сердец, любящих Тя, Тебе приносимаго, Ты бо еси первая изографскаго дела Покровительница, Ты еси и первая, Яже образ Твой пречистый на утешение роду христианскому, Тя ублажающему, благословившая. Ты бо возрадовалася еси иконе Твоей, перее написавшейся, егда иконописцев начальник и евангельских тайн благовестник Лука апостол принесе ю Тебе, и Сама рекла еси милостиво, обаче со властью, на икону ту зрящи: с сим образом благодать Моя и сила. Пробави убо милость Твою и силу Твою и нам, убогим, дерзающим и в наша дни, при скудости своей и маловерии Твой пречистый лик начертovati и Предвечнаго Младенца Христа, на руках Твоих носимаго. Укрепи нас в сем делании во славу имене Твоего святаго, утверди руце наши Твоя неописуемая и божественная черты написующия, и чрез святыя**

Твоя и честная новья иконы даруй и новую и нечаянную радость на них взирающим и пред ними Тебе молящимся. Ты бо еси, по речению великаго Твоего чтителя, Тобою избраннаго и Тобою любимаго преподобнаго отца нашего Серафима, всех радостей Радость. И Тебе славу и благодарение и благоговейное поклонение воздаем ныне и во веки веков. **А**минь.

*Богодуховенно составлена архимандритом Исаакием 22 (9) августа 1962 года (во исполнение его давнего обещания).*